

आकाशवाणी जयपुर-अजमेर
प्रादेशिक समाचार

दिनांक 01.10.2025

समय: 18.45 बजे

- केन्द्रीय मंत्रिमंडल केन्द्र सरकार रा कर्मचारियों रा मंहगाई भत्ता मांय तीन फीसदी री बधोतरी समेत केई खास फैसला कीना- रबी री साखां रो सरकारी मोल ई बधायी ज्यो।
- प्रधानमंत्री नरेन्द्र मोदी कह्यो-राष्ट्रीय स्वयंसेवक संघ देश री अथक सेवा करण सागे समाज ने मजबूत बणावण मांय खास योगदान दीनो।
- देश-प्रदेश मांय आज दुर्गा नवमी भक्ति भाव सागे मणायी ज्यी।
- राज्य रा न्यारा-न्यारा हलकां मांय आवता तीन-चार दिन बारिश रो दौर चालतो रेहवण रा आसार।

000

केन्द्र सरकार रा कर्मचारियों सारु मंहगाई भत्ता अर पेंशन लेवण वाळां सारु मंहगाई राहत मांय तीन फीसदी बधोतरी रो फैसलो करी ज्यो है। केन्द्रीय मंत्रिमंडल री आज नई दिल्ली मांय व्ही मीटिंग मांय ओ फैसलो करी ज्यो। मंत्रिमंडल री मीटिंग पाछे सूचना अर प्रसारण मंत्री अश्विनी वैष्णव आ जाणकारी दीनी। वे बतायो के इण ऊं केंद्र सरकार रा करीब 49 लाख बीस हजार कर्मचारियों अर पेंशन लेवण वाळा 68 लाख 70 हजार जणां ने फायदो व्हेला। आ बधोतरी ई साल एक जुलाई ऊं लागू व्हेला। श्री वैष्णव बतायो के मीटिंग मांय दाळां री उपज बधावण ऊं जुड़ी आवता छह महीनां री योजना ने ई मंजूरी दीरीजी। वे बतायो के रबी सीजन री छह साखां रा सरकारी मोल मांय बधोतरी रो ई फैसलो करी ज्यो। मंत्री कह्यो के देशभर मांय 57 नुवा केंद्रीय विद्यालय खोलण रो फैसलो ई करी ज्यो। श्री वैष्णव बतायो के केंद्रीय मंत्रिमंडल दलहन री उपज रा मामला मांय खुद रे पाण ऊबा व्हेवण सारु आत्मनिर्भरता मिशन ने ई मंजूरी दीनी।

.....
आत्मनिर्भरता मिशन 2025-26 ऊं 2030-31 ताई चलायो जावेला, ज्यों माथे 11 हजार 4 सौ 40 करोड़ रुपया रो खर्च आवेला। मंत्री बतायो के मीटिंग मांय विपणन सत्र 2026-27 सारु सगळी जरूरी रबी साखां रा सरकारी मोल मांय बधोतरी री मंजूरी ई दीरीजी। सब ऊं बत्ती बधोतरी **कुसुम** सारु 600 रुपया प्रति किंवटल री करी ज्यी जदके मसूर रा सरकारी मोल मांय 300 रुपया प्रति किंवटल री बधोतरी करण री मंजूरी दीरीजी।

000

प्रधानमंत्री नरेन्द्र मोदी कह्यो है के राष्ट्रीय स्वयं सेवक संघ रा खुद सेवक देश री सेवा अर समाज ने मजबूत बणावण सारु लगातार कोशिश करता रह्या है। वे आज नई दिल्ली मांय आर.एस.एस. रा शताब्दी समारोह रा तैत राख्यी ज्यो स्मरणोत्सव मांय बोल रह्या हा। ई मौके प्रधानमंत्री यादगिरी रा तौर ऊं खास डाक टिकट अर सिक्को जारी कीनो। वे कह्यो के ई भूण्या माथे भारत माता रो प्रतीक है।

.....
श्री मोदी कह्यो के काल मणायो जावण वाळो दशहरो बुराई माथे अच्छाई री जीत रो प्रतीक है।

.....
ई मौके आर.एस.एस. रा सरकार्यवाह दत्तात्रेय होसबाले कह्यो के संघ रो काम-काज देश रा हर कोणा मांय देख्यो जा सके है।

000

भारतीय रिजर्व बैंक चालू माली साल मांय मंहगाई मांय बधोतरी री रेट रो अनुमान 2 दशमलव 6 फीसदी रा लेवल माथे राख्यो है ,जो लारला अनुमान 3 दशमलव 1 फीसदी रे मुकाबले कम है। केन्द्रीय बैंक सकल घरेलू उत्पाद मांय

बधोतरी रा अनुमान ने ई बदल र 6 दशमलव 8 फीसदी कर दीनो है। ई साल अगस्त महीना मांय आर.बी.आई. जी. डी.पी. मांय बधोतरी री रेट ई साढ़े 6 फीसदी रेहवण रो अंदाजो लगायो हो। रिजर्व बैंक ब्याज री रेट मांय कोई बदलाव नी कीनो है। आरबीआई रा गवर्नर संजय मल्होत्रा आज मुंबई मांय चालू माली साल री चौथी द्विमासिक मौद्रिक नीति रो ऐलाण कीनो। श्री मल्होत्रा कह्यो के आरबीआई रेपो रेट ई साढ़े 5 फीसदी रा लेवल माथे ई राखण रो फ़ैसलो कीनो है। आरबीआई रा गवर्नर भरोसो जतायो के जीएसटी री रेट कम करण ऊं केई चीजां रा मोल मांय कमी आवेला।

000

केंद्र सरकार कानी ऊं करी ज्या जी.एस.टी. सुधारां पाछे आज झुंझुनू ज़िला रा सूरजगढ़ मांय **‘जीएसटी बचत उत्सव’** राख्यी ज्यो। कार्यक्रम मांय पैली वाळी सांसद अर भारतीय जनता पार्टी री नेता संतोष अहलावत कह्यो के अ सुधार कर ढांचा ने आसान बणावण सागे रोजीना काम आवण री चीजां ने सस्ती करेला। अहलावत कह्यो के अब दूध, ब्रेड, मोबाइल फोन, टी.वी, ए.सी. अर कारां ई सस्ता मिलेला।

000

विधानसभा अध्यक्ष वासुदेव देवनानी आज राजकीय संग्रहालय अजमेर मांय रख-रखाव अर इण ने और बेहतर बणावण रा काम री सुरूआत कीनी। आं मांय सिंधु दर्शन दीर्घा बणावण, प्रदर्शनी कक्ष रो विकास करण अर धरोहर पुस्तकालय ने और बेहतर बणावण सरीखा काम शामिल है। ई मौके उपमुख्यमंत्री दिया कुमारी कह्यो के विरासत ने संभाळ र राखणो सगळा री ज़िम्मेदारी है। दिया कुमारी संग्रहालय मांय राख्यी ज्यी दुर्लभ पांडुलिपियां ने डिजिटल बणावण सारू और बजट देवण रो भरोसो ई दिरायो।

000

आज अंतरराष्ट्रीय वृद्धजन दिवस रे मौके प्रदेश मांय भांत-भांत रा कार्यक्रम राख्यी ज्यो। ई मौके चूरू मांय एक सौ साल या बत्ती उम्र रा वोट देवण वाळां रो मान करी ज्यो। जालौर जिला रा राह गांव मांय ई तीन बुजुर्ग महिला मतदातावां रो मान करी ज्यो। भरतपुर जिला रा न्यारा-न्यारा विधानसभा हलकां मांय ई सौ साल या बत्ती उम्र रा 202 मतदातावां रो मान करी ज्यो। करौली मांय ई जिला कलेक्टर नीलाभ सक्सेना बुजुर्ग मतदातावां रो मान कीनो।

000

कृषि मंत्री डॉ. किरोड़ी लाल मीणा प्रधानमंत्री फसल बीमा योजना रा तैत **‘मेरी पॉलिसी मेरे हाथ’** अभियान रा राज्य स्तर रा कार्यक्रम री जयपुर मांय सुरूआत कीनी। पंत कृषि भवन मांय राख्यी ज्यो कार्यक्रम मांय वे किसानां ने खरीफ 2025 री बीमा पॉलिसियाँ दीनी। ई मौके कृषि मंत्री कह्यो के केंद्र अर राज्य सरकार किसानां रा फसल खराबा रा नुकसाण री भरपाई करणो तैय कीनो है। वे कह्यो के खरीफ 2025 रे दौरान आखा देश मांय करवायी ज्यी 8 करोड़ 71 लाख बीमा पॉलिसियां मांय ऊं 2 करोड़ 16 लाख यानि करीब एक चौथाई ऐकला राजस्थान री है। कृषि मंत्री बतायो के किसानां ने टेमसर पॉलिसी री छप्योड़ी कॉपी मुहैया करावण सारू 31 अक्टूबर ताई ग्राम पंचायत मुख्यालयां माथे शिविर लगाया जावेला।

000

प्रदेश रा केई हलकां मांय चौमासा पाछे ई चोखो मेह बरस रह्यो है। आज, जयपुर, भरतपुर, अजमेर, जोधपुर, कोटा अर उदयपुर संभाग मांय बिरखा व्हेवण रा आसार है। मौसम केंद्र जयपुर रे मुजब बिरखा रो दौर आवता तीन-चार दिन और चालण रा आसार है। मौसम महकमो 5 ऊं 7 अक्टूबर बीचे बीकानेर, जोधपुर, उदयपुर, अजमेर अर जयपुर संभाग मांय बारिश मांय और बधोतरी रा आसार जताया है।

लारला चौबीस घंटां मांय प्रदेश रा केई हलकां मांय हलकी ऊं मझला दर्जा री बिरखा व्ही। राजधानी जयपुर मांय ई काल बरस्या जोरदार मेह पाछे पाणी भर जावण रे कारण परेशानी रो सामो करणो पड़्यो। मौसम विभाग काल ई जोरदार बरसात रा आसार जताया है।

000

प्रदेश मांय आज वन्यजीव सप्ताह सुरू करी ज्यो। ई मौके सवाईमाधोपुर मांय राख्यी ज्या कार्यक्रम रे दौरान उप वन संरक्षक रामानंद भाकर स्कूली विद्यार्थियां ने रणथम्भौर राष्ट्रीय उद्यान री मुफ्त सैर सारु ले जावण वाळी गाड़ियां ने हरी झंडी बता र रवाना कीनी। कार्यक्रम री सुरूआत मांय जंगली जिनावरां ने बचावण रा बारा मांय जाग जगावण रा मकसद ऊं विद्यार्थियां ने प्लास्टिक काम नी लेवण री सौगंध दिरायी ज्यी अर कपड़ा रा थैला दिया ज्या।

000

आज नौरता रा आखिरी दिन महानवमी भक्ति अर उमाव सागे मणायी जा रही है। मुख्यमंत्री भजनलाल शर्मा वां रा रेहवास माथे जोड़ायत सागे कन्यावां रो देवी रो रूप मानता थकां पूजन कीनो। भीलवाड़ा रा बाबा धाम मिन्दर मांय वैदिक मंत्रां रा उच्चारण सागे 1008 कन्यावां रो पूजन कर र वां ने जीमायी ज्यी। पाली ज़िला मांय नाडोल री आशापुरा माता रो सोना रा मुकुट ऊं खास श्रृंगार करी ज्यो। सवाईमाधोपुर समेत न्यारी-न्यारी ठोडां घरां मांय कन्या पूजन रा कार्यक्रम राख्यी ज्या। ई बीचे सिरौही ज़िला मांय नौरता रे दौरान खूब गरबा रमी ज्या।

000